



Broj/Број: 04/5-50-1-1206-15-1/09
Sarajevo/Сарајево, 29. decembar 2009.

**IZVJEŠTAJ O RADU
DELEGACIJE PARLAMENTARNE SKUPŠTINE BiH U PARLAMENTARNOJ
SKUPŠTINI NATO-a ZA 2009. GODINU**

1. Uvodne napomene

Na osnovu člana 173. stav (3) Poslovnika Predstavničkog doma Parlamentarne skupštine Bosne i Hercegovine («Službeni glasnik BiH», br. 33/06,41/06,81/06 i 91/06) i člana 170. stav (3) Poslovnika Doma naroda Parlamentarne skupštine Bosne i Hercegovine («Službeni glasnik BiH», br. 33/06,41/06 i 91/06), Delegacija Parlamentarne skupštine Bosne i Hercegovine u Parlamentarnoj skupštini NATO-a, na 15. sjednici, održanoj 29. decembra 2009. godine, usvojila je Izvještaj o radu za 2009. godinu.

2. Aktivnosti Delegacije PSBiH u PSNATO tokom 2009. godine

Uvod

Parlamentarna skupština NATO-a



Parlamentarna skupština NATO-a je međuparlamentarna organizacija koja okuplja parlamentarce iz 28 država članica i 14 država pridruženih članica.

Parlamentarna skupština NATO-a osnovana je 1955. godine i tada je funkcionirala u obliku godišnje konferencije parlamentaraca država članica NATO-a.

Ciljevi Parlamentarne skupštine NATO-a mogu se definirati kao:

- podsticanje dijaloga među parlamentarcima o glavnim pitanjima sigurnosti
- upoznavanje NATO-a i država članica NATO-a s mišljenjem parlamentaraca,
- osiguravanje veće transparentnosti politike NATO-a i većeg stepena kolektivne odgovornosti
- jačanje transatlantskog odnosa
- pružanje pomoći u razvoju parlamentarne demokratije uključivanjem parlamentaraca iz zemalja koje nisu članice u rad Skupštine
- pružanje direktne pomoći parlamentima koji aktivno traže članstvo u Skupštini
- povećanje saradnje sa zemljama Kavkaza i Mediterana
- pružanje pomoći u razvoju parlamentarnih mehanizama za efikasnu demokratsku kontrolu oružanih snaga.

Između Parlamentarne skupštine NATO-a i NATO-a nema formalnog odnosa, ali ipak blisko sarađuju budući da predsjednik Skupštine učestvuje na samitu šefova država i vlada država članica NATO-a itd.

Parlamentarna skupština NATO-a održava **dva plenarna zasjedanja** godišnje, jedno u proljeće, krajem maja, i drugo u jesen, u oktobru ili novembru.

Na **proljetnom zasjedanju** komisije razmatraju svoje izvještaje i sastaju se sa zvaničnicima vlada i ekspertima. Skupština na plenarnoj sjednici razmatra ključne teme i obraćaju joj se lideri država i lideri međunarodnih organizacija: predsjednik Parlamentarne skupštine NATO-a, visoki zvaničnik države domaćina, generalni sekretar NATO-a i drugi.

Na **jesenjem zasjedanju** usvajaju se izvještaji komisija i preporuke, koje nisu obavezujuće, ali se upućuju vladama i parlamentima država članica i pridruženih članica. Generalni sekretar NATO-a upućuje pisanu reakciju na preporuke.

Na jesenjem zasjedanju parlamentarcima se obraća predsjednik Skupštine NATO-a, visoki zvaničnik države domaćina i generalni sekretar NATO-a.

Biraju se zvaničnici Skupštine: predsjednik, pet potpredsjednika i šef finansija. Predsjednik i pet potpredsjednika biraju se na jednogodišnji mandat i mogu biti još jedanput ponovo izabrani. Šef finansija bira se svake druge godine.

Sadašnji predsjednik Parlamentarne skupštine NATO-a je **John Tanner**, kongresmen iz SAD.

Skupština takođe ima **Biro i Stalni komitet**.

Biro čine predsjednik, pet potpredsjednika i šef finansija.

Stalni komitet čine po jedan član svake delegacije država članica i predsjednik, pet potpredsjednika i šef finansija.

Radni jezici Skupštine su engleski i francuski.

Parlamentarna skupština NATO-a ima **pet komisija i osam potkomisija**.

Komisije pripremaju izvještaje i preporuke u vezi s NATO-om, koji se zatim razmatraju na plenarnoj sjednici. Preporuke se nakon usvajanja upućuju parlamentima i vladama država članica i pridruženih članica, NATO-u i drugim međunarodnim organizacijama.

Između ostalog, komisijama se obraćaju visoki vladini zvaničnici.

Sve komisije održavaju sastanke za vrijeme proljetnog i jesenjeg zasjedanja. Komisija za odbranu i sigurnost, Komisija za ekonomiju i sigurnost i Politička komisija također se sastaju svakog februara u Briselu s visokim zvaničnicima NATO-a i EU.

U okviru komisija postoje potkomisije, koje se detaljnije bave posebnim pitanjima. Osam potkomisija obično se sastaju nekoliko puta godišnje i posjećuju različite zemlje kako bi se upoznale sa situacijom na terenu i o tome pripremile izvještaj.

Komisije:

1. Komisija za civilnu dimenziju sigurnosti

Potkomisija za demokratsko upravljanje

2. Komisija za odbranu i sigurnost

Potkomisija za transatlantsku saradnju u oblasti odbrane i sigurnosti

Potkomisija za buduće sposobnosti u oblasti sigurnosti i odbrane

3. Komisija za ekonomiju i sigurnost

Potkomisija za ekonomsku saradnju Istoka i Zapada

Potkomisija za transatlantske ekonomske odnose

4. Komisija za politička pitanja

Potkomisija za transatlantske odnose

Potkomisija za partnerstva NATO-a

5. Komisija za nauku i tehnologiju

Potkomisija za pitanja širenja vojne tehnologije

Seminari

Skupština svake godine organizuje tri *Rose-Roth* seminara i dva seminara Mediteranskog dijaloga.

Od 1999. godine Skupština je pokrenula godišnji Program za nove parlamentarce, u kojem učestvuju novi članovi parlamenta, na primjer novi članovi delegacije.

Transatlantski forum

Skupština održava godišnji Parlamentarni transatlantski forum u Sjedinjenim Američkim Državama, na kojem članovi Skupštine s američkim stručnjacima razmatraju transatlantska gledišta o nizu pitanja vezanih za NATO.

Posebna grupa za Mediteran sastaje se obično tri puta godišnje, ali ne za vrijeme plenarnih zasjedanja.

Parlamentarni komitet NATO - Rusija okuplja šefove delegacija država članica i šefa Delegacije Rusije. Sastaje se za vrijeme plenarnih zasjedanja Skupštine.

Međuparlamentarno vijeće Ukrajina – NATO čine predstavnici komisija Skupštine i vodeći članovi Parlamenta Ukrajine. Vijeće se sastaje dva puta godišnje, jednom u Briselu i jednom u Kijevu.

Od 25. maja 2007. Parlamentarna skupština Bosne i Hercegovine u Parlamentarnoj skupštini NATO-a ima status pridružene članice.

Članice Parlamentarne skupštine NATO-a:

1. Albanija
2. Belgija
3. Bugarska
4. Češka Republika
5. Danska
6. Estonija
7. Francuska
8. Grčka
9. Hrvatska
10. Island
11. Italija
12. Kanada
13. Letonija
14. Litvanija
15. Luksemburg
16. Mađarska
17. Holandija
18. Norveška
19. Njemačka
20. Poljska
21. Portugal
22. Rumunija
23. SAD
24. Slovačka Republika
25. Slovenija
26. Španija
27. Turska
28. Velika Britanija

Pridružene članice **Parlamentarne skupštine NATO-a:**

1. Armenija
2. Austrija
3. Azerbejdžan
4. Bosna i Hercegovina
5. Crna Gora
6. Finska
7. FYR Makedonija
8. Gruzija
9. Moldavija

10. Ruska Federacija
11. Srbija
12. Švedska
13. Švicarska
14. Ukrajina

Predstavnici **Evropskog parlamenta** imaju 10 predstavnika u PSNATO.

Regionalni partneri i Mediteranske zemlje - pridruženi članovi imaju 20 predstavnika u PSNATO.

Predstavnici parlamenta Alžira, Maroka, Izraela i Jordana imaju svoje predstavnike u ovoj grupi.

U radu PSNATO učestvuju i **parlamentarni posmatrači** sedam zemalja među kojima su predstavnici Australije, Egipta, Japana, Kazahstana, Palestinskog vijeća za legislativu, Tunisa i Južne Koreje.

2a. Pregled aktivnosti Delegacije PSBiH u PSNATO tokom 2009. godine

Tokom 2009. godine, Delegacija PSBiH u Parlamentarnoj skupštini NATO-a održala je sedam sjednica.

Učešće Delegacije na zasjedanjima, seminarima i sastancima tokom 2009:

- Proljetno zasjedanje Parlamentarne skupštine NATO-a u Oslu, Norveška, 23 – 27. maja 2009.
- Godišnje zasjedanje Parlamentarne skupštine NATO-a u Edinburgu, Škotska, 13 - 17. novembra 2009.
- 70. *Rose Roth* seminar u Bosni i Hercegovini, Sarajevo, 19 - 21. marta 2009.
- Program za nove parlamentarce u Briselu, 9 – 13. jula 2009.

Od posebnog značaja za rad Delegacije bilo je organizovanje 70. *Rose-Roth* seminara u Sarajevu, koji su organizirali Parlamentarna skupština Bosne i Hercegovine i PSNATO. Prema zvaničnim ocjenama PSNATO, 70. *Rose-Roth* seminar bio je izvanredno organiziran i protekao je u duhu postavljenih ciljeva. Tokom seminara u Sarajevu raspravljalo se o aktuelnoj situaciji u Jugoistočnoj Evropi, odnosno na Zapadnom Balkanu, o graničnoj sigurnosti na Balkanu, reformi sektora odbrane i sigurnosti u BiH, energetske sigurnosti na Balkanu, Bosni i Hercegovini, Crnoj Gori i Srbiji: izazovi i mogućnosti, reforma odbrane, evroatlantske integracije, saradnja s Međunarodnim sudom u Hagu (YCTI) i situacija na Kosovu.

Posebno značajan događaj tokom 2009. godine bio je sastanak koji su članovi kolegija oba doma PSBiH i članovi Delegacije PSBiH u PSNATO održali 27. 11. 2009. u Sarajevu s Andersom Foghom Rasmussenom, generalnim sekretarom NATO-a.

Delegacija PSBiH u PSNATO obavezna je da učestvuje u aktivnostima PSNATO u svojstvu pridružene članice. U skladu s tim, članovi Delegacije PSBiH u PSNATO obavezni su da se pridržavaju ciljeva i programa postavljenih u aktivnostima (konferencije, seminari, rad u komisijama) PSNATO.

U sadašnjoj fazi i aktivnostima koje Bosna i Hercegovina sprovodi sa NATO-om, korist od učešća na zasjedanjima PSNATO je višestruka. Članovi Delegacije PSBiH u PSNATO su u poziciji da prisustvuju godišnjim zasjedanjima (proljeće, jesen), da učestvuju u radu komisija, da daju predloge i sugestije na ponuđene dokumente (deklaracije i rezolucije) te daju svoje i mišljenje Delegacije o određenim pitanjima koja su predmet razgovora na konferencijama i seminarima. Članovi Delegacije su u prilici da se tokom zasjedanje sretnu s predstavnicima drugih delegacija, kako stalnih članica tako i pridruženih, da s njima razmijene mišljenja o određenoj problematici te da lobiraju za ostvarivanje ciljeva za koje se Bosna i Hercegovina opredijelila svojom zvaničnom politikom.

U Prilogu su date kompletne informacije o učešću Delegacije PSBiH na pomenutim seminarima i zasjedanjima Parlamentarne skupštine NATO-a.

PREDSJEDAVAJUĆI DELEGACIJE
dr. Milorad Živković

Prilog:

- Izvještaj sa 70. *Rose Roth* seminara, održanog u Sarajevu, Bosna i Hercegovina, 19. - 21. 3. 2009.
- Izvještaj s proljetnog zasjedanja Parlamentarne skupštine NATO-a u Oslu, Norveška, 23. - 27. 5. 2009.
- Izvještaj sa Godišnjeg zasjedanja PSNATO, održanog u Edinburgu, Škotska, 13. - 17. 11. 2009.

Dostaviti:

- Kolegiju Doma naroda
- Kolegiju Predstavničkog doma
- Kolegiju Sekretarijata